



La excellentas cundiziuns da neiv digl unviern vargau han procura per in fetg bien onn da fatschenta per la Runal Péra SA a Trun.

FOTO MAD

La finanziaziun dil runal niev a la Péra a Trun ei segirada

Quest atun vegn il niev indrez da runal a la Péra a Trun installaus. Cun excepiun da tschun petgas survegn quei pign territori da skis ina cumpletamein nov'infrastructura. Sco la presidenta dalla societad acziunara, Nora Zürcher, ha saviu orientar alla radunanza generala, ei la finanziaziun dall'investiziu segirada.

HANS HUONDER/FMR

Il venderdis sera ha la Runal Péra SA salvau sia radunanza generala. Commembra e commembres han buca mo dau in guard sigl onn da fatschenta passau, mobein surtut era sigl avegnir. La societad ei numnadamein sedecidida da remplazzar il runal. L'infrastructura veglia ei – cun excepiun da tschun dallas sis petgas – vegnida demontada suenter la davosa stagiun d'unviern.

Rodund 450 000 francs vegn il runal niev a custar. La societad ei ida alla

tscherca da quels mieds finanzials e sco quei che *Nora Zürcher* di, ei la laver intensiva encoronada da success: «La finanziaziun ei segirada aschia che nus savein entscheiver cun buna cunsenzia cullas lavurs en rodund duas jammnas.» Buca cumpriu el project ei in'investiziu ella cuschina. Sco ei vesa ora savessent engins mieds finanzials era aunc star a disposizion per lezza: «Il mument savein nus aunc buca tgei che nus savein investar en lezza. Da basegns havess ella denton era.» Tenor *Nora Zürcher* ein las luibentschas obtenidas pil runal niev era

colligadas cun entginas pretensiuns supplementaras. Era quellas cuostan zatgei dipli. Igl indrez dil runal sco tal vegn furnius la fin da november. Sche tut va tenor plan e da quei ei la presidenta dil cusselg d'administraziun perschudida, vegn il runal niev en funczion cull'entschatta dalla stagiun d'unviern vegnenta: «Entochen lu sperein nus naturalmein era che nus hagien neiv.» Tut en tut sustegnan rodund 300 personas ni instituziuns finzialmein quella grond'investiziu che savess buca vegnir pertada sulettamein dalla societad.

In fetg bien unviern 2020/21

Il territori da skis da la Péra denter Trun e Rabius ha profitau igl unviern vargau da corona. «Nus havein giu in fetg bien unviern. Bia glieud ha tscherciu in territori pign enstagl d'in grond pervia dil virus», puntuescha *Nora Zürcher* ch'ei dipli dus onns presidenta dil Runal Péra SA. Havess l'ustria era aunc saviu arver si'scha, füss il resultat aunc staus megliers. Persuenter eis ei stau pusseivel d'arver silmeins la terrassa dil Refugi. Grazia alla buna svilta ha la societad

schizun saviu far ina reserva finanziala. Il menaschi a la Péra ha cuzzau dils 13 da decembre 2020 entochen ils 7 da mars 2021. Las cundiziuns da neiv ed aura ein stadas trasatras fetg bunas, han denton era pretendiu dipli engaschament enten far pista. La statistica muossa ch'igl unviern 2020/21 ei staus in dils megliers insumma seigi pertuccont svilta sco frequenzas. Pusseivel ei quei stau grazia al grond diember da dis ch'il menaschi dil runal ei staus aviarts. Era quel schai per in bien ton sur la media dils davos onns.

A pei sul Passo dell'Uomo al giug d'Ambri-Piotta

Dapi otg onns viandescha ina gruppera dalla Surselva mintg'atun dil Lucmagn sul Passo dell'Uomo entochen Ambri per mirar leu in giug da hockey sin glatsch. L'idea ei naschida – sco biaras autras – duront ina sera da divertiment.

HANS HUONDER/FMR

Il venderdis vargau ha il HC Ambri-Piotta dauer igl emprem derbi tessines dil hockey sin glatsch da quest atun a casa encounter Lugano. Quei ei mintgamaai in dils puncts culminants della stagiun. Uonn ei quella scuntrada stada sut ina steila aunc pli speciala. Ambri-Piotta ha numnadamein retschiert il concurrent en siu stadiun niev. Silla tribuna ei era ina gruppera dalla Surselva stada: Ina formaziun tut speciala.

La novavla ga

«Ina sera da divertiment essan nus – ina gruppera d'anteriurs collaboraturs dalla Distec SA el luvratori a Trun – seduman dai tgei che nus savessent interpredner ensemble per promover la collegialitat, il spért da team, sco ins di. Tgi leva ir a viandar e tgi a mirar hockey. Aschia havein nus cumbinava quels dús glavischs», di *Vito Giorgio*. Denter ils amits dil hockey era ei in fan da Lugano ed in da Tavau. Aschia ei la gruppera sedecidida da preferir negin e dad ir a mirar in giug d'in auter club. Uonn ei quei viadi vegnius fatgs per la novavla ga: «Nus serim-nein mintgamaai la damaun baul el buffet dalla staziun a Mustér agl emprem caffé Luz ed igl emprem solver. Igl auto da posta meina lu nus sil Lucmagn nua ch'ei dat in secund caffé Luz ed in secund



La gruppera duront la tscheina. Da sen. Patrick Schneider, Vito Giorgio, Simon Bundi, Gian-Luca Lutz, Peter Heini, Christian Manetsch ed Eugen Demont.

solver.» Lu entscheiva il viadi pér da dretg: «Da leu va ei sil Passo dell'Uomo nua ch'ei dat in apero. A Cadagno vegn lu mintgamaai surviu a nus pulenta ed ell'ustria dil Ritom ina gervosa.» Ei suonda il viadi culla pendiculare giuella Leventina ed a Piotta vegn lu tschenau, mintga ga el medem restaurant. «Quei ei mintga ga carn buglida, pia aschidadir zatgei sco ina suppa cun carn», di *Vito Giorgio* cun bucca rienta. Da leu suonda il viadi cun auto – il taxi empustaus da Trun – el stadion da hockey. Leu ein ils bigliets pil giug reservai.

Nus tenin culs blaùs

«L'emprema ga che nus havein fatg quei viadi ed essan i a mirar hockey ad Ambri savevan nus buca tgei equipa ch'era tgeinina. Nus havevan lu semplamein fatg giu da tener culs blaùs», di *Vito Giorgio*. El decours da quels otg onns seigi quei buca semidau da rudien: «En sesez va ei gnanc ton pil hockey sco per la cumpannia.» Suenter il giug suonda lu il via-di sul Lucmagn anavos sisum la Surselva. Igl emprem viadi han tschun persunas fatg, silsuenter ei quei diember variaus: «Uss ei quei era in eveniment per outras persunas che vulan sedivertir e far quei viadi cun nus. Il venderdis vargau eran nus siat.» Sur WhatsApp vegn mintgamaai coordinau il termin adina igl atun pli u meins dil medem temps.